



Chemchemi Itoshelezayo

Yesu akajibu, akamwambia, Kama ungaliijua karama ya Mungu, naye ni nani akuambiaye, Nipe maji ninywe, ungalimwomba yeye, naye angalikupa maji yaliyo hai.—Yohana 4:10.

Je! Yesu alimwambia nini mwanamke Msamaria katika kisima cha Yakobo? ... “Maji nitakayompa yatakuwa ... chemchemi ya maji yakibubujikia uzima wa milele.” Maji ambayo Yesu alikuwa akiyazungumzia hapa yalikuwa ni ufunuo wa neema Yake katika Neno Lake; Roho Wake, mafundisho Yake, ni kama chemchemi itoshelezayo kwa kila roho. Chanzo kingine chochote watakachokikimbilia hakitawatosheleza. Lakini neno la ukweli ni vijito tulivu, vilivyowasilishwa kama maji ya Lebanoni, ambayo yanatosheleza wakati wote. Ndani ya Kristo Yesu kuna ukamilifu wa furaha ya milele zote. Matamano, anasa na maburudisho ya ulimwengu kamwe hayatoshelezi wala kuleta uponyaji kwa roho. Lakini Yesu anasema, “Yeye aulaye mwili wangu, na kuinywa damu yangu, anao uzima wa milele.”

Uwepo wa neema ya Yesu katika Neno Lake unazungumza rohoni daima, ukimwakilisha kama kisima cha maji ya uzima ili kuiburudisha nafsi yenye kiu. Ni fursa yetu kuwa na Mwokozi aliye hai na wa milele. Yeye ni chanzo cha nguvu za kiroho zilizowekwa ndani yetu, na mvuto Wake utabubujika katika maneno na matendo, ukiwaburudisha wote ndani ya eneo la ushawishi wetu, ukizalisha ndani yao shauku na matamano ya nguvu na usafi, kwa ajili ya utakatifu na amani, na kwa furaha ile isiyoleta huzuni ndani yake. Haya ni matokeo ya uwepo wa Mwokozi akaaye ndani yetu.

Yesu alisema, “Tazama, Mimi niko pamoja nanyi siku zote, hata ukamilifu wa dahari.” Aliwahi kutembea kama mwanadamu duniani, uungu Wake ukiwa umefunikwa kwa ubinadamu, mwanadamu atesekaye na kujaribiwa, akishambuliwa na hila za Shetani. Alijaribiwa katika Nyanja zote kama sisi tujaribiwavyo, na anajua namna ya kuwasaidia wale wanaojaribiwa. Sasa yuko katika mkono wa kuume wa Mungu. Yuko mbinguni kama wakili wetu, akifanya upatanisho kwa ajili yetu. Sharti tuwe na faraja na tumaini siku zote tunapolitafakari hili. Anawafikiria wale ambao wanakabiliwa na majaribu katika dunia hii. Anatufikiria kila mtu binafsi, na anajua kila hitaji letu. Unapojaribiwa, sema tu kuwa, Ananijali, Ananiombea, Ananipenda, Alikufa kwa ajili yangu. Nitajitoea kikamilifu Kwake.

Tunauhuzunisha moyo wa Yesu tunapojiombolezea wenyewe kana kwamba sisi ni waokozi wetu wenyewe. Hapana; lazima tukabidhi utunzaji wa roho zetu kwa Mungu kama kwa Muumba mwaminifu. Yeye yu aishi daima ili kuwaombea wale waliopata majaribio na majaribu. Fungua moyo wako kwa ajili ya miale angavu ya Jua la Haki, na usiruhusu hata pumzi moja ya shaka, neno moja la kutoamini, epuka uropokaji, usije ukapanda mbegu za mashaka. Kuna baraka tele kwa ajili yetu; hebu na tuzipokee kwa imani. Ninawasihi muwe na ujasiri katika Bwana. Nguvu za Mungu ni zetu; na hebu na tuongele ujasiri na nguvu na imani.... Beba ushuhuda ulio hai kwa ajili ya Mungu uwapo katika hali zote (Testimonies to Ministers and Gospel Workers, 390, 391).